

**Talamdan sa
Mga Mensahe alang sa Full-time Training
sa Spring Term sa 2024**

**LINANGKOB NGA HISGOTANAN:
ANG MAHINUNGDANONG MGA PUNTO SA KAMATUORAN SA MGA SULAT NI PABLO—
IKADUHANG CORINTO**

Mensahe 2

Mga Binihag sa Madaogong Prosesyon aron Magsaulog sa Pagdaog ni Cristo

Basahong Kasulatan: 2 Cor. 2:14a;

1 Juan 3:8; Heb. 2:14; 1 Ped. 3:18-19; Bug. 1:18; Efe. 4:8; A. A. 4:4

- I. Kinahanglan nga duna tay panan-awon sa pagdaog ni Cristo—1 Juan 3:8:**
- A. Sa pagpakatawo ug pagkinabuhi ni Cristo ingon nga tawo, gipildi Niya si Satanas sa dihang gitintal Siya didto sa kamingawan—Mat. 4:1-11.
 - B. Gipadayag ang Anak sa Tawo aron molaglag, motunaw, mobungkag, sa mga buhat sa yawa—mohukom sa sala diha sa unod, molaglag sa gahom sa sala (sa masal-anong kinaiya sa yawa), ug mokuha sa sala ug mga sala—1 Juan 3:8.
 - C. Pinaagi sa kamatayon gilaglag ni Ginoong Jesus ang yawa, nga dunay gahom sa kamatayon; giwagtang Niya si Satanas, gihimo siyang kawang—Heb. 2:14.
 - D. Dayag nga gipakaulawan sa Dios ang daotang mga manulonda, gidaog sila diha sa krus ni Cristo—Col. 2:15.
 - E. Diha sa Espiritu sa pagkadios ni Cristo, gimantala Niya ngadto sa daotang mga espiritu sa bung-aw nga walay kinutoban ang pagdaog Niya ni Satanas didto sa krus—1 Ped. 3:18-19.
 - F. Sa pagkabanhaw naa ni Cristo ang mga yawe sa kamatayon ug Hades—Bug. 1:18.
 - G. Sa pagkayab ni Cristo gidala Niya ang nagprosesyon nga mga kaaway nga binuntog; giluwat ta Niya gikan sa pagbihag ni Satanas ug giangkong nga Iyaha—Efe. 4:8.
 - H. Sa pagkayab ni Cristo dunay prosesyon ning mga kaaway nga binuntog, gidala ingog mga binihag sa gubat, aron magsaulog sa pagdaog ni Cristo—2 Cor. 2:14a.
- II. “Salamat sa Dios, nga kanunayng nagdala kanato sa pagdaog diha ni Cristo”—v. 14a:**
- A. Sa 2 Corinto 2:14a gigamit ni Pablo ang sambingay sa prosesyon nga gipahigayon agig pagpasidungog sa Romanhong heneral:
 - 1. Ang pulong *nagdala* nagpasabot og pagdala sa mga tawo ingog mga binihag diha sa prosesyon.
 - 2. Nagpasabot ang tibuok pamulong og pagdalag binihag diha sa pagdaog batok sa mga kaaway ni Cristo.
 - B. Sa 2 Corinto 2:14a gisimbolohan ang mga magtutuo sa mga binihag ni Cristo diha sa madaogong prosesyon Niya.
 - C. Nagsaulog ang Dios sa pagdaog Niya sa Iyang mga kaaway; si Pablo nga dakong kaaway kanhi sa ebanghelyo binihag nga nagsunod sa lumbay sa madaogong prosesyon.
 - D. Ang pulong *kanato* sa 2 Corinto 2:14a nagpasabot sa mga binihag nga binuntog diha sa lumbay sa pagdaog ni Cristo, nga nagsaulog ug nangapil sa pagdaog ni Cristo:
 - 1. Ang tanang tawo nga gipahigawas ni Cristo binihag Niya nga naa sa Iyang gahom ug pagbulot-an.
 - 2. Aron ikapaambit si Cristo ang Iyang Kaugalingon kanato, kinahanglang mabihag ta.
 - E. Gipildi, gibuntog, gidaog, ug gibihag ta ni Jesus; nagsalig na ta Niya karon, gihimo Siyang tanan nato diha sa prosesyon sa pagdaog Niya.
 - F. Wala tingali ta makaamgo nga nabihag, nadaog, napanag-iya, ug nabatonan na ta ni Cristo, ang Mananaog, ug nga mga binihag ta karon diha sa lumbay sa Iyang madaogong prosesyon, apan kon nakaamgo ta kalabot ning butanga, makapalahi kini nato:
 - 1. Bation gyod nato kanunay nga nabihag, nadaog, ug nabatonan na ta ni Cristo—v. 14a.
 - 2. Kalabot nato, makaamgo ta nga wala ta, walay nabatonan, ug walay mahimo.

3. Ang binihag tawo nga karon bug-os na gyong alang sa tawong nagbuntog niya, kay nasayod man nga usa na siya karon sa mga nagmartsa diha sa madaogong prosesyon sa tawong nagbihag niya.
- G. Gipakita ni Pablo sa 2 Corinto 2:14a nga binihag siya ni Cristo:
1. Kusganon, ambisyoso nga batan-on si Saulo nga taga-Tarso nga nakig-away ni Cristo, sa pamati-gayon sa Dios, ug sa kaiglesiahan—Buh. 9:1-22.
 2. Kaniadto nakig-away si Pablo ni Cristo, sa langitnong Heneral, apan sa kapulihay, napildi, nadaog, ug nabihag siya ug tungod niana nahimong binihag ni Cristo.
 3. Sa nabihag na siya, gibutang siya sa madaogong prosesyon ni Cristo isip usa sa mga binihag diha sa lumbay sa napilding mga kaaway.
- H. Ang gikinahanglan sa iglesia dili espirituhanong mga higante kondili gagmayng mga binihag; busa, moingon gyod tang tanan sa madaogong Cristo nga, “Ginoo, andam kong mahimong binihag Nimo.”

III. **Buntogon gyod ang atong pagbuot, ang tawhanong pagbuot, ang kaugalingong-pagbuot—2 Cor. 2:14a; A.A. 4:4:**

- A. Kon modapig ang pagbuot sa tawo sa diosnong pagbuot, nan, matuman ang kabubut-on sa Dios—Rom. 12:2; Efe. 1:9, 11; 5:17; Mat. 6:10:
1. “Timon” ang binuhat-sa-Dios nga pagbuot nato; maingon nga moliko ang sakayan sumala sa timon, molihok ta sumala sa atong pagbuot.
 2. Sa usa ka bahin, mga ulipon ni Cristo kitang mga magtutuo; sa laing bahin, basin mga kaatbang, mga kaaway, pa gihapon ta ni Cristo kay wala pa man mabuntog o madaog ang atong pagbuot.
 3. Basin naa sa sulod nato ang daghang butang sa kaugalingon, lakip na ang makinaugalingong pagbuot, makinaugalingong tinguha, ug makinaugalingong mga hunahuna.
 4. Wala tingali ta masayod unsa kadaghan ang masupilong mga elemento nga naa sa atong sulod; busa, pildihon, dag-on, buntogon, ug sa kapulihay bihagon gyod ta sa madaogong prosesyon sa pagdaog ni Cristo—2 Cor. 2:14a.
- B. “Ang imong liog sama sa tore ni David, / Nga gitukod alang sa tipiganan sa mga hinagiban: / Gipamitay niini ang usa ka libo ka kalasag, / Ang tanang taming sa gamhanang mga tawo”—A. A. 4:4:
1. Nagtimaan ang liog sa tawhanong pagbuot nga nagpasakop sa Dios; giisip sa Ginoo nga labing matahom nga butang ang pagpasakop sa atong pagbuot.
 2. Maanyag ang maghihigugma ni Cristo sa pagkabaton niyang pagbuot nga mapasakopon ni Cristo (liog nga sama sa tore ni David) ug dato sa gahom nga nanalipod (mga kalasag ug mga taming sa gamhanang mga tawo):
 - a. Kon mapasakopon ang atong pagbuot, pagbuot nga nabuntog na sama sa panon sa mga kanding nga nanglubog sa bakilid (v. 1b), mapadayag ang atong pagbuot sama sa tore ni David nga dunay mga hinagiban batok sa mga pangatake.
 - b. Nigawas na ang maghihigugma ni Cristo sa iyang natural nga pagbuot, ug nagbarog siya karon sa iyang nabanhawng pagbuot batok sa kaaway—Efe. 6:11, 13.
 - c. Labi nga mabuntog ang atong pagbuot, labi sab tang matransporma—Rom. 12:2.
 - d. Una, buntogon gyod ang atong pagbuot; makusgan dayon kini diha sa pagkabanhaw ug masama sa tore ni David, nga tipiganan sa mga hinagiban alang sa espirituhanong pakiggubat—Efe. 6:10.
 - e. Gitipigan diha sa nabuntog ug nabanhawng pagbuot nato ang mga hinagiban alang sa espirituhanong pakiggubat—2 Cor. 10:3-4.
 - f. Sa espirituhanong pakiggubat labi gyod tang managang, mobarog batok sa tanang yawan-on, malalangong mga pangatake sa kaaway—Efe. 6:10-20.
 - g. Ang mga kalasag ug mga taming nga nanalipod nato batok sa mga udyong sa kaaway gitipigan sa tore sa nabuntog ug nabanhawng pagbuot sa mga nagtinguha sa Ginoo.